

## DOMENIE XI «VIE PAL AN»

### Antifone di jentrade cf. Sal 26,7.9

Scolte, Signôr, la vôs dal gno berli.  
Tu sês tu il gno jutori:  
no sta parâmi vie,  
no sta bandonâmi, Diu de mê salvece.

### Colete

Diu, fuarce di chei che in te a sperin,  
scolte ben disponût lis nestrîs preieris,  
e, stant che cence di te la debolece dai oms no pues propit nuie,  
danus simpri il jutori de tô gracie  
par che o metìn in vore i tiei comandaments  
e ti plasìn tes intenzions e tes oparis.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Es 19,2-6

Jo us tignarai in cont di un ream di predis, une gjernazie sante.

Dal libri dal Esodo

In chei dîs, i Israelits a rivarin tal desert dal Sinai e si camparin tal desert; Israel si campà li, in face de mont.

Alore Mosè al lè sù li di Diu. Il Signôr lu clamà stant su la mont e i disè: «Chest tu disarâs a la cjase di Jacop, tu ur fasarâs savê ai fîs di Israel: O vês viodût cui vuestris vôi ce che jo ur ài fat ai Egjizians e cemût che us ài puartâts fûr su alis di acuile e menâts viers di me. Cumò se o scoltais la mê vôs e o rispietais il gno pat, jo us tignarai come robe mê framieç di ducj i popui, stant che dut il mont al è gno. Jo us tignarai in cont di un ream di predis, une gjernazie sante».

Peraule di Diu.

### SALM RESPONSORIÂL dal Salm 99

**R.** Nô o sin il so popul, il trop che lui al passone.

Berlait al Signôr di dute la tiere,  
servît il Signôr cun ligrie,  
presentaitsi denant di lui plens di gjonde. **R.**

Ricognossêt che il Signôr dome lui al è Diu;  
lui nus à fats e nô o sin la sô vore,  
so popul e trop che lui al passone. **R.**

Parcè che bon al è il Signôr  
e il so boncûr al è par simpri;  
la sô fedeltât e va di ete in ete. **R.**

### SECONDE LETURE Rm 5,6-11

Se o sin stâts metûts in buinis cun Diu in gracie de muart di so Fi, tant plui cumò o sarin salvâts midiant de sô vite.

De letare di san Pauli apuestul ai Romans

Fradis, cuant che nô o jerin inmò pecjadôrs, Crist, tal timp destinât, al è muart pai triscj. E je intrigade cjatâ fûr un che al sedi disponût a murî par un just; salacor un al varès la fuarce di murî par un galantom. Ma Diu nus dà la prove dal so amôr par nô propit tal fat che, cuant che nô o jerin ancjemò pecjadôrs, Crist al è muart par nô. Tant plui cumò duncje, justificâts midiant dal so sanc, o

sarìn salvâts dal svindic in grazie di lui. Di fat se, cuant che o jerin nemîs, o sin stâts metûts in buinis cun Diu in grazie de muart di so Fi, tant plui cumò, che o sin tornâts in buinis, o sarìn salvâts midiant de sô vite. E no dome chest, ma si vantin ancje in Diu midiant dal Signôr nestri Jesù Crist, che in grazie di lui o sin stâts riconciliâts.

Peraule di Diu.

### **CJANT AL VANZELI Mc 1,15**

**R.** Aleluia, aleluia.

Il ream dai cîi al è dongje.

Convertîtsi e crodêt tal vanzeli.

**R.** Aleluia.

### **VANZELI Mt 9,36-10,8**

**Clamâts dongje di sè i dodis dissepui, ju mandà.**

Dal vanzeli seont Matieu

In chê volte, Jesù, viodint lis folis sfinidis e lassadis di bessolis, tant che pioris cence pastôr, al vè dûl di lôr. Alore ur disè ai siei dissepui: «Il racuelt al è tant, ma i operaris a son pôcs. Preait duncje il paron dal racuelt che al mandi operaris pal so racuelt».

Clamâts dongje di sè i siei dodis dissepui, ur dè il podê di parâ fûr i spirts soçs e di vuarî ogni sorte di malatie e di infermitât.

I nons dai dodis apuestui a son: par prin Simon, che i disin Pieri, e Andree so fradi; Jacum, fi di Zebedeu, e Zuan so fradi; Filip e Bartolomiu; Tomâs e Matieu il publican; Jacum di Alfeu e Tadeu; Simon il cananeu e Jude Iscariot, chel che dopo lu tradi.

Chescj a son i dodis che Jesù al mandà, dopo di vêur dadis chestis istruzions:

«No stait a lâ tune strade di paians, ni a jentrâ tune citât di Samaritans. Lait a cirî pluitost lis pioris dispierdudis de cjase di Israel. Passant fûr par fûr pes stradis, predicjait disint: Al è dongje il ream dai cîi. Vuarî i malâts, risussitait i muarts, smondeait i levrôs, parait fûr i demonis. O vês vût a gratis, dait a gratis».

Peraule dal Signôr.

### **Su lis ufiertis**

Diu, che cun chescj regâi dal pan e dal vin

tu nudrissis la gjernazie umane

e tal sacrament tu le fasis tornâ gnove,

fâs, par plasê, che no nus mancji

chest sostentament dal cuarp e da l'anime.

Par Crist nestri Signôr.

### **Antifone a la comunion Sal 26,4**

Une robe i domandi al Signôr e dome cheste o brami:

di stâ te cjase dal Signôr ducj i dîs de mê vite.

### **O ben: Zn 17,11**

Al dîs il Signôr: Pari sant, tenju cont tal to bonvolê

chei che tu mi âs dât, par che a sedin un come nô.

### **Daspò de comunion**

Cheste sante comunion che o vin ricevude, Signôr,

come che e je spieli de unitât dai fedêi cun te,

cussì e rivi a dâ dongje inte unitât la tô Glesie.

Par Crist nestri Signôr.

